



Akɔm gi ci Anim Kɛɲɛrawet Reezinte o Joowo

**Zoozok ci lotinto
weregewe o Joowo**

Zoozok ci adomnyai weregewe o Joowo

Nothing Can Separate Us
From the Love of God

**Words of Comfort from
the Bible**

Passages from the Word of God



AMERICAN BIBLE SOCIETY
Sharing God's Word with the World

Akóm gi ci Anim Keñerawet Reezinte o Joowo

Anyak werege nici zoosok ci atovyai Werege o Tammó Murleye. Ajoyai Werege o Tammó ween Terkediin o Colai Murleye ñaati akóle ñinto **www.bible.is**. Ma anyak baryak karabon een jinen werege nico itoontek ol koko:

Liñliñon o Abalyin zóoz Murleye
PO Box 64
Juba, South Sudan
murle_project@sil.org

Ayēeda Kóle o Werege o Tammó Amerika werege o kazi Akóm gi ci anim keñerawet reezinte o Kiristo zooze ween kēmeribonjin, ma bar otontak Majma o Mecekiya o Jonglei Libir ci jenu o Kanisa o Mecekiyo Junub Sudana góol ci ka kabaliyi werege nico Murleye. Atal zin Kanisa o Mecekiyo Junub Sudana SIL o Junub Sudano tirtente uneen giye o aruwan werege nico.

Ma Kóle o Werege o Tammó Amerika alañ aróon kaal ci ajowa liñliñonte nico ka kurukta weregenya o Tammó kókóm rak zoosok ci ajina niigi óla. Ñaan baal akanan irkitowe ween 1816 e akana niigi liñliñon ci abalyi Werege o Tammó zoosowe ci ol oogi goole ci ka kóbówó ñaati akeebine. Ma Kóle o Werege o Tammó Amerika boorit ci Dowin o Kóle o Werege o Tammó baal óornóon zee makacin adaala loocok ci ayaan kaboot ram. 200 e, ka kuruume gi o aroonny. Abon zin niina akeebi Werege o Tammó ma oobei ol oogi buk. Mā aroonnyu weregenya oogi ci aruyai Werege o Tammó ijinit Kóle o Werege o Tammó Amerika omoloye koko 1-800-32-BIBLE karabon ayeedei ol koko:

Kóle o Werege o Tammó
101 N Independence Mall East
8th Fl
Philadelphia PA 19106.

Cinó websait o Kóle o Werege o Tammó Amerika! **www.bibles.com**

Nothing Can Separate Us From the Love of God

This book contains portions of the Murle Bible. The Murle New Testament can be found online at **www.bible.is**. Enquiries and comments about this book can be sent to:

Murle Language Project
PO Box 64
Juba, South Sudan
murle_project@sil.org.

The American Bible Society published the original ‘Nothing Can Separate us From the Love of God’ in English but has given permission to East Jonglei Presbytery of the Presbyterian Church of South Sudan to translate this into Murle. The PCSS thanks SIL, South Sudan for the technical help with the formatting and printing of this book.

The American Bible Society is a not-for-profit organization which publishes the Scriptures without doctrinal note or comment. Since 1816, its single mission is to make the Bible available to every person in a language and format each can understand and afford. Working toward this goal, ABS is a member of the United Bible Societies, a worldwide effort that extends to more than 200 countries and territories. You are urged to read the Bible and share it with others. For a catalog of other Scripture publications, call the American Bible Society at 1-800-32-BIBLE or write to:

American Bible Society
101 N Independence Mall East
8th Fl
Philadelphia PA 19106.

Visit the ABS website! **www.bibles.com**

Murle New Testament © 1996 Wycliffe Bible Translators, Inc.
Other content translated from ‘Nothing Can Separate Us From the
Love of God’ © 1999 American Bible Society used with
permission
The Murle New Testament was originally published in 1996 by The Bible
League

First Edition	September 2017
Trial Edition	November 2015

Publisher: East Jonglei Presbytery of Presbyterian Church of South
Sudan
Place of Publication: Juba, South Sudan



Zeedinet ci Zoozowu

Kanan	5
Areezet Jooi Ageet Dook Ɔroot Ele.....	7
Karome Naaga ki Jook Iinya Dook	11
Agamanet Jooi ma Areezet Ageet Dook	15
Azedjai Jooi Olee o Aborne Loota	19
Mayo Nun mã Kadaayito Ɔjaan Kavɔ Kojowa gi o Kare Naaga Joowa Nokɔ	23
Aku Bonati Ween Didi Kare Naaga Joowa Doon	29
Aterkedek Jooi Roget o Abil Been Neen ɔl o Atu Nɔɔɔ Dook	35
Kanaryonek ɔl o Ajowa Piryakzet.....	39
Yelzan o Werenya o Tammo	41





Kanan

Mã amena kaala ci agooni noko noko, avu koca tiñeere iinya ci amɔɔrni ɔl dook kanonot. Ma apirna tiñeere ɔl ci meelik goole nico. Ma agido tiñeere ɔl dook korogjowe ma anyak zinzeeti cigeec o bornet nɔɔɲ ma acin eleeti akom eet ci ka kitirit nɔɔɔ. Ma acin eleeti kizik aavtiyo doon, ma aavtiyek daayiz doon.

Maje weregewe o Joowo anyak gi ci adɔɔi ma aricani aduyai azi ne; mayo nun mã ɔɔɔɲ rogeti kotoboret, karabɔɲ etedoyet ɔl ageet, karabɔɲ kojokta eleeti kaavtiyo doon, Jooi onai areezet karome kibeene ageet. Jook iimi ziniz ma amena areezet ageet noko, kɔɔrkɔr kibeene ageet noko mayo nun mã izi looci gerze. Akeebonek reezinet been bonat onin dook nɔɔɔ. Mã anyak gi ci akanai, abon kaada gi o azi Pɔl ne; Akom gi ci anim keɲerawet ageet reezinte o Joowo ɲaaten Yesu Kiristo.

Kiyo akeebi zoosok ci werege ci Joowo ayeedi weregewe nico noko, ono reezinet o eelanet Jooi ki rewinet been lotinet o azɔɔzeke niini ɔl o apirna ma agide looce nico.





Areezet Jooi Ageet Dook Ɔroot Elɛ

Aduwa Wɛrɛgɛ o Tammo gi ci azooni jooi eet ci deer labak calaŋ acin nɔɔnɔ ɛlɛ eeci bitaalu, karabɔŋ acin tuwen cin, karabɔŋ een alaazet cin baayiza. Aduwaket Wɛrɛgɛ o Tammo reezinet o Joowo ki zuuti o azooni Jooi ɔroot al o apez gɔnɔgja ma aanyek kiziti kaal ci labak. Ayelzeket Yesu reezinet nico alye onin ɛlɛ, ki demzinte onin ki kaale ogin agɔɔn been baayize onin baal abaayi loota ŋina e.

Akunak Yesu Looc ka kizi ruguzoi, calaŋ een Pakcoi

Ma agerɛny Yesu molooye ci appe azi nɛ; ɛɛti ci atuyan aneet alaŋ atuyan aneet doon bar atu baaba o itoonanan aneet buk. Ma ɛɛti ci acinan aneet icin buk niini eet o itoonanan aneet. Kakun zin naana o ka kizi voortin ci loocu, ka mǎ anyak eet ci atuyan aneet ka calaŋ bodo niini aavi muura.

Mǎ anyak eet ci azii zɔɔz caan o ma alaŋ atu, alaŋ naana kapayei nɔɔnɔ gerzitin. Eeci alaŋ kakun naana o ka kiya kapayek looc gerzitin bar ka korogoz. Ma ɛɛti ci aburnan aneet, ma alaŋ agama zɔɔz caan o, anyak eet ci ŋaan apayek nɔɔnɔ gerzitin iitene ci aɔorneke looci e tɔ.

Eeci akom gi ci kaduwa naana owe caan doon, bar baaba o itoonanan aneet neen o ilotekan gi o abil been neen.

Ma gi ci kaduwa naana o kaduwa eo aduwakan baaba o itoonanan aneet.

Jon 12.44-50

Arɛɛz Yesu ɔl o abor gɔnɔgja

Ma vuruta oton Yesu ɲinito ɔto, mazi ɲaan awɔ gɔɔla nɔko, icin Matiyu o gɔɔn alot meeri aavi loota maktabe onin. Ma anek Yesu nɔɔnɔ nɛ, “Nowawan”

Enico ɛɛ itija Matiyu ma ano nɔɔnɔ.

Mazi akɔ adake Yesu korge o Matiyu, anyak buk ɔl ci meelik ɲinaante olee o gɔɔn alot meeri kibeɛn ɔl oogi olee o gɔɔn alaɲ azooni lotinok o Juz. Ma avu azɔlɔ but niigi ki Yesu kibeɛn nuyak ogin ɲaatodoi. Mazi acin ɔl ogen olee o Parici gi nico enektek nuyak o Yesu nɛ; madim alaani cunoon ɔ azɔlɔ ki ɔl ci gɔɔn alot meeri o ki ɔl ci ger o naa?

Mazi azii Yesu gi nico, ɛbɛɛkɛ niini nɔɔgɔ enek nɛ: Gɔɔn ɔl ci alaɲ amɔɔr arɔɔɲ niigi akim? Bar arɔɔɲ akim ɔl ci amɔɔr doon. ɔto zin oroonit kɛɛɲ ci zɔɔz o aduyai weregewe o Joowo azi nɛ; alaɲ karon ɲutuguuzeyan kɛɛg ceen todoyok o doon, bar karon zinzeeti bonat ka kagama todoyok cugooc o. Mazi naana alaɲ kakun o ka kiya Kotowa ɔl o abon, bar kakun o, ka kiya kotowo ɔl ger.

Matiyu 9.9-13

Awuyet Yesu kiziti gotonogi ki nonogi

Ma anek Yesu nuyak bodo ne, “Keen naana keet dikiran. Maje baaba niini eet o keetu neen. Ma anyak oton calan abiir naatan, ajeedak niini tuu. Maje oton o gon abiir, azeec ka kibiir juruun. Inoko zin niiga itilizawu giye o zoz baal kaduwaku e. Oromtozeyan zin niiga aneet, maje buk naana karomoneku igeet. Akom gon laadun oton ci abiir alye cin doon calan akanonek keet dikiran. Ma alaj aromonekan niiga aneet, eelnu buk koca niiga noko. Keen zin naana keet dikiran, maje niiga eeginu oto. Ma eeti ci aromonekan aneet, maje buk naana karomonei nono, eet o abiir juruun neen. Eeci ma kadeyai naana naatunoon, akom niiga doon gi ci ka utuguz. Ma anyak eet calan aromonekan aneet, ateedjak koca niini looc kiyo keet otoni o, ma araabjai, ma alote ka kakatozek goo. Ma oromtozeyan niiga aneet, ma aavu zoz onane naatunoon, olla ma anyak gi ci aroonyu, ma ajinu Jook, ajowanu. Ma abiirnu juruun, anyak gi nici baaba diindin. Ma izitu koca didi niiga nuyak cigan. Ma naana kareezu igeet kiyo areezan buk baaba aneet o. Uruktek zin zo looc reezinte can o. Ma azuunu lotinok cigan o, urukteyu koca zo looc reezinte onan didi kiyo kazoone naana lotinok o baaba, ma buk karuwei zo looc reezinte onin o.

“Kaduwakuṅ zin naana zɔɔz nico o, ka talniin onane kaavu ṅaatunooṅ, ka zin talniin unooṅ kidikir. Zɔɔz zin caan kilotekuṅ ce. Ɛrɛɛzto niiga dook kiyo buk kareezuṅ naana igeet o. Akom bodo reezinet ci adikir kujuk ci adaakni ɛeti ṅaati laṅotigin. Zin mǎ agoonu niiga kaal ci kilotekuṅ naana igeet o, izitu koca niiga laṅotigan didi. Inoko zin alaṅaan naana kawuyuṅ bodo igeet iziti gabara, eeci gɔɔn gabarenti alaṅ gi ci agɔɔn alaani onine aga. Bar zin inoko naana kutuwuṅ igeet iziti laṅotigan, eeci kuduwayuṅ igeet kaal o kaziikna ṅaati baaba dook. Alaṅ aṅeranaṅ aneet niiga, bar kaṅeranuṅ igeet naana ka ibiirta kebere ci ɛel been neen. Ka zin kaanyuṅ baaba igeet gi ci olla ajinu niiga nɔɔno zaare ogan. Inoko zin kilotekuṅ gi ci kanekuṅ ne, Ɛrɛɛzto niiga dook.”

Jɔn 15.1-17

Iinyaye baal ṅaan abaayi Yesu loota e, ilalek waanice niini Jook o anyak dɔyiz ṅaati aluweke nɔɔno ka kitirit Jooi nɔɔno kemez daayiz. Iziwun ni waanice Jooi nɔɔno, eeci acelbezan niini ele, ma areez Jook ma agɔɔn kaal o arɔɔṅ Jooi doon. Mayo nuun een niini ṅeerti Joowo ele o, ɛdemɛz niini gɔɔl ci azooni zɔɔz o Joowo gidente baal apirnanɛ e nɔko. Ma zin giye baal ozooti niini demzinte nico, izi niini gɔɔl ci elyanɛ ol dook o azooni zoozok ogin

Ibiri 5.7-9



Karome Naaga ki Jook Iinya Dook

*Mayo nun mā anyak lɔɔci kaal ci iina, aavi Jooi ɲaatinai,
mayo nun gɔɔn mā kapirna arɔɔŋ ka kagaac aavi niini tɔ.*

Ma yo nuun Kaavtiz naaga ɲaati Muur Gili- inyik Aavi Jooi ɲaatinai Tɔ Nɔkɔ

Towayoi caan neen Manyi o;
aanyan kaal o karoon rogete onan dook.
Aanyan niini aneet niini aneet kege ɲaati aliz,
ma akoyan vitenane ci anyak mam ci lilim.
Aanyan niini aneet dɔyiz ci colai,
ma arayinan golowe ci abon
giye o aterkedekan aneet.
Mayo nun mā kawɔ ɲaati muur,
alaŋ kanyei ɲoliin been neen Manyi,
eeci karome naana kibeen ineet.
Eeci keet unune towawinto abekan aneet.
Idimdimaneyan niina aneeta dayiin ogan,
maje ɔl o amarninan aneet olla aɲamnekan.
Atalnanan niina aneet kiyo eeti o atalna kernoi o titiny
o,
ma aanyan maam ci kawudi kodoca tɔc.

Kagawa zin bonati unune ki reezinet unun aavu ḡaatan
noko been neen.

Ma een tiḡeere ceez cune o, koroḡ can kabaaye ḡinti
ḡaan karogne o dook.

Beninok 23

Mayo nun mā kigide mā okomawet gi ci abon kare, ḡaan aavi Jooi ḡaatinai noko

Aḡarowo ni Jona ijin Manyi ween Tammu onin ḡaati
aave kulugit keeḡa eecito. Ma azi ne,

“Manyi onan, piryakzete caan kipiiraye noko kutuwin
ineet ma abarizeyan,
ḡaabaal kagawe ele ka waan kadaak kutuluweyin ineet
karoḡ tirten iziiyan ni.

Ujukeyan waanice niina aneeta liil boloc eecito,
ukuuyawan ni maama ugune aabur amacuco
walaganyak dim.

Bar kaze ne, ‘Oḡoḡyan ḡuume unun,
bar bodo ḡaan kacin ceez unun alile labak.’

Koowa waanice naana maami eecito,
ma izi daayizi aḡon noko.

Ma ukuuyawan maama lai,
ma adonozeyan boyitot oo.

Koowa zee ma kako karuum biyen o eel liil keeḡa
loota.

Konyogozeya ḡinite izi neen.

Bar zin ineet Manyi ween Tammu onan neen o iranawan

aneet loowe o daayizo.
Izi waanice rogeti zigit ɲaatan,
kaadawin ni ineet,
mazi kawuyin,
iziiyan ceeze unun alile.
Ma zin ɔl o adiɲɲan joowane o adilyai eegin kaal o
labak,
otonit niigi reezinet unun anyayei niina nɔɔgo.
Bar zin tiɲeere kagoonekin naana ineet todoyok,
ma kaben beniinok ci kanyiin ineet zaany;
ma kagoon kaal o katerkedi dook,
eeci aku rokzen ɲaatun ineet Manyi.”

Jona 2.1-9

Akɔm gi ci ka keɲerawet ageet reezinte o Joowo

Inoko zin kaale nicoko dook, mɛ koromte naaga
kibeen Jook didi ɲeneen zin bodo koca ci ka komoget
ageet o? Akɔm kina! ɲaan Jooi kujurai ɲeerin ɲaati
itoonake looc, bar itoona niini nɔɔno kiya kadaak ɲaaten
ageet. Zin yo mɛ aanyet niini ageet ɲeerin onin eɛ o,
alaɲ tiɲeere bar aanyet niini ageet kaal o aterkedeket
dook.
ɲeneen zin bodo ci ka kɔkɔlak ɔl o eɲera Jooi rooni o?
Akɔm kina! Eeci aanyet ageet kobonta ɲuume onin Jooi

alya. Ɗeneen zin bodo ci ka kizi ne, keegin naaga gerze o? Akom kina! Eeci Yesu Kiristo adaak ɗaatinai ma itinawi Jooi noon daayiza, ma inoko aavi niini aziite o Joowo azo tammu tadena ma ilalek niini Jook ɗaaten ageet.

Gitaaz zin ci ka keɗerawet ageet reezinte o Kiristo o? mayo nuun ma inaket kaala ci gerze kiyo piryakzet ki gidɛn, ki magizeti ,ki maatiz, kibeɛn zɔɔz ci arɔɔɗ ku-ruktet ɔl ageet kadaayit o, akom gi ci ka keɗerawet reezinte o Kiristo been neen. Abil kiyo ayeedi were-gewe o Joowo azi ne; aɗon goon daayizi ɗaaten ageeta iinya dook noƙo, eeci kanuyin naaga ineet. Agoonet goon ɔl ageeta kiyo eezana o avɔyi ɔl tonɗin o, bar zin naaga kamog kaal ci ger apirnanet ageet noko dook lai ɗaaten dooyiz o Yesu Kiristo o areezet ageet.

Kaga zin naana ɔroot ele akom gi ci ka keɗerawet ageet reezinte o Kiristo, yo nuun een daayiz, karabon een roget, karabon een toonnyak o tammo, karabon een miniɗ, karabon een dooyiz oma ci abil Tammu tadena, karabon een loota, karabon een kaal ci ka keyelizyai katin, karabon een kaal ci eel Tammu keɗa, karabon een kaal ci eel todo loota. Alan kaalyana nicigi dook ka keɗeryawet ageet reezinte o Joowo kanyak naaga ɗaaten Manyi onai Yesu Kiristo.

Rom 8.31-39



Agamanet Jooi ma Areezet Ageet Dook

*Piryakzet kibeeri eleeti wucez avunaket ageet gerzitina zee
ma aanyet kababanit gi ci bar kizik Jooi otoṅawet ma
alaṅan azuunet. Alaṅ zin zɔɔz nici alɛemnyai, eeci gɔɔn
oṅneket Jooi baciinok ogaac, iinya dook ma areezet ageet
dook.*

Amena Jooi Aruwerk zɔɔ looc reezinte onin

Abon kanaati Manyi alye onan dook!
Abon kanaati zaar ogin alile rogete onan dook.
Abon kanaati Manyi alye onan dook ma
alaṅ kaanyi kereyeyan bonati online.
Eeci nɔɔnɔ neen o oṅnekan baciinok ogan,
ma aruguzan gɔɔn moorizɔi.
Nɔɔnɔ neen o azuunan daayiza,
ma amayukan reezinte onin giye o kawucneke nɔɔnɔ.
Aanyan niini kaal o karoṅ rogete onan dook
ka zin kemeda kizi colak ma kadoi kiyo zerooc o.
Apak Jooi kaal gole ci eelane ɔl o agide,
ma aanyek nɔɔgɔ kaal o agano ki nɔɔgɔ.
Eyelek baale niini zɔɔzok ogin Mosis,
ma aanyek ɔl o Israyil kicinit liṅliṅonok ogin adɔɔi.
Jooi niini reezinet ma awucnek ɔl

ma alaŋ abor noŋ gaaga,
 ma anyak reezinet ci abil been neen.
 Alaŋ niini amena ŋaati agernyeket
 ma alaŋ aborneket noŋ ŋinti reen.
 Alaŋ niini arooket ageet giye o kaganon ki royinet,
 ma alaŋ acaca kaal ci agano ki baciinok ki gerzitin
 onai.
 Kiyo adewo Tammu taden ki tado noko been neen o,
 appe but reezinet online olee o aŋole noŋo noko.
 Aaranet niini ageet baciinok ogaac dook koŋ many
 kiyo adewo jeen ki nyagi o.
 areez zin buk Manyi ol o aŋole noŋo kiyo goŋ areez
 eeti dool ogin o.
 Aga gi baal laadun eenycanet niini ageet e,
 ma aada gi baal eenycanet niini laadun tadowaca
 e.
 Abil zin ageet rogeti cinai o kiyo arte o,
 kiroktai ma kalina kiyo koroboli o too goŋ anyarnyar
 zee
 mazi ivaan ŋoŋti arabjai ma adicai lai calaŋ bodo
 kacin o.
 Maje ol dook o aŋole noŋo, aanyek niini noŋgo kobonta
 noko been neen,
 ma aavi reezinet online ŋaatineen noko been neen.
 Agoonek noko ol o azooni terkedin onin,
 ma azii lotinok ogin ma azooni zinzeeti laliza.
 Aarek Manyi lecer onin avuzito tammu taden
 ka kizi alaan ci kaal dook.

Atanaaz Manyi niiga toonnyawa o tammu tadenu

adoknu ma azuunu ricaniinok ogin

ma aziknu zoozok o aduwakuṇ niini igeet.

Atanaz Manyi niiga doyizowa dook o tammu tadenu,

niiga gabara o agoonu gi o arɔɔṇ niini.

Atanaz Manyi kaala dook o ɛɛnycanuṇ niini

vitenane ogin abal.

Abon zin kanaati Manyi buk naana alye onan ɛɛ.

Uduutayet Jooi reezinet onin ageet dook

Inoko zin kiziti naaga ɔl ci kabon ŋuume o Joowo giye o katuwi Yesu Kiristo, ma kanyayit naaga ganɔn ki Jook ŋaaten nɔɔnɔ. Ma Yesu Kiristo iiten baal kagaman naaga nɔɔnɔ e zɛɛ been inoko o, aanyet niini ageet kagac deten o aku Joowa. Katalnɛ zin naaga ɔrɔɔt ɛɛ, eeci kaga tiŋeere kazɔl naaga kibeɛn nɔɔnɔ titinyɔn onin. Ma katalnɛ buk naaga matɛ gɔɔn kagide, eeci kaga giden ademezet gɔɔl ci ka gɔɔn kɛmɛzti piryakzɛt zinzeetine ci alal. Mazi kamez piryakzɛt zinzeetine ci alal, atalnɛ Jooi ma kaga naaga nɔkɔ tiŋeere agooneket niini ageet kaal o aterkedeket dook. Zin naaga katu didi alaṇ niini alabanet ageet kaale nicoko, eeci ayeleket niini reezinet o areezet niini ageet ɔrɔɔt. Ma buk aareket niini reezinet zinzeeti ogaac dɔyize o vɔṇiz onin anyet ageet.

Baale ako mazi ɔkɔmawet ageet gɔɔl ci ka kitiriti eleeti

ogaac dooyize cinai doon e, iiya Yesu Kiristo adaak naaten ageet o onenu iitene o anrak Jooi noono. Ma gi nici adoi kak oroot eete ci deer naati adaakni goone ci abon. Karabon koca gon te etti oman agama daayiz ci elane eet ci abon kiyo etti nici o labak. Bar zin Jooi eyeleyet reezinet onin areezet ageet oroot giye o itonane Kiristo kiya kadaak naatinai iiten baal naan kanyayi naaga on e oroot e. Inoko zin kobonta nuume o Joowo giye o iiya adaayi Yesu Kiristo naatinai. Inoko zin kaga naaga aruguzet tijeere niini ageet payinte o Joowo. Baale inaan Yesu kiya kadaak baciinowe ogaac e, kegin naaga mirok ci kamarno ki Jook. Mazi iiya adaak neerin Yesu e, abadayet niini ageet kiziti lanoten ki noono bodo. Ma giye o kizitoi naaga lanoten ki Jook, kaga aruguzet tijeere Yesu ageet, eeci Itina niini daayiza ma inoko arogi. Alan een zin bar gi dook neen nici, bar buk kaanyek naaga Jook zaany naaten Manyi onai Yesu Kiristo, eeci abadaayet niini ageet kizito lanoten ki Jook.

Rom 5.1-11

Aanyet Jooi yubzen naaten Yesu

“Ivitayan zin niiga dook o apirnanu kaale o loocu, aneet ka kiiya kaanyun igeet uyubuzit. Agamta demziin onan zinzeetine ugooc dook. Ivita edemeztu naatan, eeci aneet alalnan ziniz, ma kacelbezan ele. Ka zin ivita ojokta niiga yubzen eleetine ugooc kizi zinzeeti tiv. Eeci demziin ci ka kanyun naana igeet o alan adoi.”

Matiyu 11.28-30



Azɛɛɗjai Jooi Olee o Aborne Loota

*Ayelza Jooi weregewe onin gi ci aɛɛzi niini ɗɔl o apirna
kiyo ɲaai o boɣek ki dɔɔl ween booyok, ki ɗɔl o atɔɔyai
vitenane ugeec abaayi, ki ɗɔl ween mirɔk. Amena zin inoko
o reezinet onine ki bonat onin olee o abor gɔnɔgja baayiza,
ma aanyek kiziti kaal ci celbez.*

Acin Jooi ɗɔl o apirna ma azooni nɔɔɔ

Adiɗɗiɗ Manyi Jooi kujuk joowane dook, ma ajuk
ɗɔɔyizi onine dooyizok dook. Anyak niini diɗɗiɗon been
dooyizok dook, ma agano ɲaati kazikni nɔɔno. alaɲ niini
ɛɛz ɗɔl ma alaɲ agama moɲanin ɗɔl. Arɔɔɲ niini booyok,
ki ɲaai o boi kanyayit ɗɔl juruun, ma aɛɛz ɗɔl ween mirɔk
ɲaati aroɲen ki ɗɔl ogaac yaak, ma aanyek nɔɔɔ dayiin,
ki ruumanɛ. Abon zin buk niiga aɛɛzu nɔɔɔ, eeci
baale niiga alya eeginu mirɔk masire. Abon zin aɲolinu
Manyi ween Jook unoon ma abon adiɗɗiɗɲanu nɔɔno
doon. Aanycek zinzeeti kiimte ɲaaten nɔɔno ma abon
agoonu kaal o aterkedu zaare ogin doon. Atanaaz nɔɔno
ween Jook unoon ma icintu keberene ugooc maany kaal
ogin baal agoon ɲaatunoon e dook, waanbaal avɔyi jiji-

tugooc Masire e, eegin waanice niigi eet iiyu kamoto
noko, bar inoko Manyi ween Jook unoon aanyun azaace
iziti mele kiyo monyonya o tammu keenu o.

Lotinok o vuruto 10.17-22

Yesu niini gabaren o Joowo o baal apirna ma aborne

Azi zin Manyi ne,

“Aleemnyi tijeere liqliqoni ci gabaren caan o kanyak
keen,

ma tijeere anaat ol dook noon.

Aruk waanbaale ol ci meel kulurkuluri naati acini noon,
uruwe waanice niini zee ma kizik alan een eet ci
deer.

Bar zin inoko ol ci meel loota nina ibiirit ooti dindinqonte
onin,

makacin alaata o loocu okoma gi ci aduwa giye o
abiirti noon ooti.

Acin tijeere niigi noon,

ma ajeez gi ci naan laadun kagaac.

Ma abariz ol zoz ci azi ne,

“Akom eet ci utu zoz ci kazikna noko

ma akom eet ci icinun dooyiz ci Joowo ayelzai noko.

Bar zin baale nica baabani o Joowo doon o aanyek
gabaren onin

kitina kiyo keet o aduna naa adai o.

Akɔm waanice nɔɔnɔ dɪndɪɔn ki linat
ci ka kaanyet kiyezta nɔɔnɔ.
Akɔm waanice gi ci alinaket ɲaatin
ma buk akɔm gi ci ameneket ɲaatin.
Kɛpɛzta ni naaga nɔɔnɔ ma kaburna nɔɔnɔ.
Ɛmez ni niini piryakzɛt nice ki ɛɛ wucez
Akɔm waanice ɲaatinaai eet ci ka kicin nɔɔnɔ,
kɛpɛzta nɔɔnɔ ma kaanyeka kizi gi ci labak.”

Izaya 52.13-53.3

Ma bɛɛ o abor ɔl o gɔɔn ɛɛnyɛt ceezi ma aanyɛk kizi gi ci labak, bar tiitiny Joowa

Ivitaak zin niiga Manyi o rogeto. Atoobo niini ki bɛɛ
o tiitiny baal abor ɔl, ma aanyɛk kizi gi ci labak e. Bar
zin ɛɲɛra nɔɔnɔ Jooi, eeci niini tiitiny ɔrɔɔt ɲaatin.
Eelnu zin buk niiga rogete cunooɲ o kiyo biyɛɛn o.
Abon zin ɛɛnycai ceez o Joowo vɔɔɲizo ɲaatunooɲ.
Ɛɲɛrawuɲ Jooi igeet iziti gabara cigin titiny ka aanyɛk
niiga nɔɔnɔ kaal o abon zinzeetinu o agamnyai ɲaatin
goole o Yesu Kiristo. Kayabzei naana Yesu bɛɛ ci tiit-
iny o, eeci azi wɛrɛgɛwi o Joowo nɛ, “Inoko kaareya
kutuɔr onan kazi Ziyɔn bɛ ci titiny ɔrɔɔt ci kaɲɛra
naana. Ma ɛɛti ci ano nɔɔnɔ, ajowa didi niini kaal o

katerkedei naana ol.”

Ma bɛɛ nici titiiny ɔrɔɔt ɲaatunoon igeet o atuyu nɔɔnɔ.

Maje bar olee o alaɲ atuwe, atoobo niigi ki ol o eeny-
cinto abor bɛɛ o tiitiny kujuk gɔnɔgi.

1 Pitɔr 2.4-7

Mayo Nuun Mā Kadaayito Ŋaan Kavɔ Kojowa gi o Kare Naaga Joowa Nɔko

*Ma mɔɔrizi aanyet ageet gawiin ci kagawi gi o keegine
naaga daayizok, maje buk werɛgewi o Joowo aduwaket gi
ci anyayi roget ci tiitiny ɔɔɔt ŋaati kadaakti.*

Ceezi ogaac kaari kɔr loota ŋina kibeena ceezi ween didi o ɛɛl been nɛn tammu tadena

Zin giye nico alaŋ naaga kalaca eleeti been nɛn, mayo nuun avɔ eleeti cigaac o ki daayiz o, azaci bar tuwen onai kɔdɔk zinzeetine ogaac iinya dook nɔko. Ma piryakzet ci kapirnanɛ naaga noko gi ci miliny ter, ma alaŋ buk akɔ ŋinti wuun. Bar zin piryakzete nico aanyet tiŋeere Jooi ageet diŋdiŋɔn ci appe ɔɔɔt ci abil been nɛn. ma gi nica appe ɔɔɔt kujuk piryakzet nico. Alaŋ zin abon ŋaati kaareke naaga ooti piryakzet ci iinya ci miliny ter noko, bar abon kabaaban kaal o ŋaan kicinit inoko o, ma tiŋeere kaal nica ɛɛl nɔko been nɛn.

Ma eleeti cigaac o loota ŋina ɛɛl kiyo ceezi o kari kɔr o. Kanyak naaga eleeti nicoko ŋintimiliny. Mazi kadaai, kooŋnek looc ŋina. Kaga zin naaga ma kadaayito, ma kotoŋtek eleeti nicoko looc, akɔ aanyet bodo Jooi ageet eleeti ci colai tammu tadena. Agoonaket ageet eleeti

niceke Jooi ka korogit noko been neen. Inoko zin mā karɔɔŋ ka kɔɔto kanyayit eleeti ci colai tammu tadenu neke kipirya naaga eleetine ci loocu noko labak.

Tiŋeere ma kadaai, alaŋ katoobo ki miniŋ o akom eleeti, bar kavo kanyak naaga eleeti ci colai. Maje inoko ŋinti ŋaan rak karogni naaga loota ŋina noko, kapirna ɔɔɔt. Alaŋ zin karɔɔŋ daayiz, bar karɔɔŋ eleeti o colai eel tammu tadena, ka eleeti cigaac adaai noko kirigizit gɔɔɔgja ci arogi been neen. Idimdimaneyet Jooi ageet gi nico laadun. Ma aanyet niini ageet Voɔŋiz onin ka keyeleyet ageet didi tiŋeere kajowa naaga kaal nicoko dook.

Zin giye nico kanyak naaga moozet tup noko . Eeci kaga naaga maŋaan rak kanyak eleeti ci loocu noko o, alaŋ rak karome ki Manyi tammu tadena. Ma ŋinti ŋaan kabaayi loota ŋina o, katu Manyi, bar zin ŋaan rak kacin noono.

Keegin zin naaga moote, ma karɔɔŋ kotoŋit eleeti ci lootu noko ka kɔɔt koromte naaga ki Manyi tammu tadena.

Omoge Daayizi

Anyaa baale laadun daayiz looc eeti codoi ɗɔr noko. Ma buk goole ci atoobo ki nico, anyaa bodo ŋaazi daayiza eeti codoi ɗɔr noko. Zin buk kiyo adaai ol dook giye o eegine niigi dool ci dool o Adam o, buk tiŋeere

iɲaani Jooi ɔl dook daayiza goole ci abil nɔkɔ giye o oromtozeke niigi Yesu Kiristo. Ma kaala nici akanai katin kezɛɛdjai nɔkɔ., eeci itɲa Kiristo daayiza ɔɔwa niini. Zin katin mǎ abadaak niini looc, iɲaaz ɔl oɲine atu nɔɔnɔ dook daayiza. Ma vuruta iiya ni looc dicaan. Ma iitene nice uulal katin Kiristo doyizok o alaat o loocu dook, kibeɛn alaazet o Loryento abali niini looc. Mazi odot, odoma ni niini aanyek baliin onin Jook ween baatinai. Abal tiɲeere Kiristo ɔl dook zɛɛ ma amɔg Jooi ɔl o amarnin nɔɔnɔ dook. Aanyek ni Jooi Kiristo korocek nɔɔgɔ looc zɔɔne.

Ma vuruta ɔmɔge ni miroiti o aɲorneke een daayiz.

Azi werɛgewi o Joowo nɛ, “Aanyek Jooi ɲɛerin korocek kaal dook looc zoone ogin.” Zin giye nico kaga naaga abal didi tiɲeere Yesu kaal dook. Ma zɔɔz nici alaɲ akati gi ci ka katin kabali Yesu Jook, eeci aanyek nɔɔnɔ kabal kaal nicoko dook. Jooi alya. Ma iitene ci katin aanyeke Jooi Yesu Kiristo kaal dook e, buk niini alya ween ɲɛerti Joowo abadaan ɛɛ kizi kidic ɲaati baatin o aanyek nɔɔnɔ kaal nicoko kabal, ka zin enice kabal kaal dook Jooi doon.

. . .

Izikɔ di juruunɲ. Karoonɲ kuduwayunɲ gi ceen didi ɲaan laadun kagawe ce. Aɲorneke waanma lɔɔci iɲaan ɔl ogen ɲaatinai arogi nɔkɔ. Enice mazi abɛɛ toromba o aɲorneke, aanyoneket ageet dook eleeti ci colai enico ɛɛ kiyo abadi bɔɔɔye o. Ma iɲaaz ɔl baal adaayito e dook

daayiza, ma aanyonek buk nɔɔgɔ dook eleeti ci colai. Ma alaŋ bodo naaga dook kadaai nɔkɔ been neen. Zin eleeti cigaac kanyak ame noko, abon ookci kiziti eleeti calaŋ ame. Ma eleeti cigaac gɔɔn adaai noko, abon ookci kiziti eleeti ci arogi nɔkɔ been neen. Zin katin waanci akanan kaala nici, ma utuye eleeti ci gɔɔn adaai noko kiziti eleeti cigaac arogi been neen, eɛemnyai didi koca zɔɔz o ayeedi weregewe o Joowo azi ne, “Otoorei daayizi. Omogun Jooi daayiz. Alaŋ bodo daayizi abada nɔkɔ been neen. Okoma daayiz dɔyiz onin gɔɔn aruyi ɔl kadaayito.” Gɔɔn laadun naaga kadaai o, eeci kanyak oŋec. Ma oŋeci anyak dɔyiz ŋaatinai o, eeci eyeleyet lotinowa o Joowo ageet kagaac oŋeci niini gitaaz. Abon zin naaga kaanyek Jook zaany, eeci aanyet niini ageet dɔɔyiz ci kamɔgi daayiz ŋaaten Manyi ona Yesu Kiristo.

Dɔl o yaai kareezuŋ, abon aruweku zɔɔ looc juruun calaŋ amoonu tuwenta. Emeda ilinlinɔit linlinɔn o Manyi Yesu tup, eeci agayu niiga linlinɔnti ci alinlinoneku

Okoma balɔn ma okoma daayiz

Kicina ni tammu taden ci colai, ki looc ci colai. Maje tammu taden o reen been looc o reen been liilok iziti ɗim. Ma kacin kutuur o Joowo titiny kazi Jerusalem Colai. Akunak kutuuri nici looc Joowa tammu tadena.

Ma adimdiman Jooi kutuur nico kiyo kabarzeci o
ayinyiŋan ɛɛ ka kitivice o. Ma kazii molok ci appe aku
lecere o Joowo. Azi mɔɔyi nici nɛ, “Inoko iiya Jooi ka
kiiya koromte ki ɔl o deer. Ka kabaayito niini ki nɔɔgo
ɲaatodoi ka zin kiziti niigi ɔl cigin. Ma abaak Jooi niini
alya ɲaatodoi ki nɔɔgo kizi niini Jook cineen. Ka zin
keɛya niini nɔɔgo tilalo keberene ugeec. ɔkoma bodo
daayiz, ki culum, been luwa ci aluwi ɔl. Ma ɔkoma buk
balɔn, eeci idicai kaala baal reɛn e dook lai.”

Wunozyak 21.1-4





Aku Bonati Ween Didi Kare Naaga Joowa Doon

*Aduwa weregeewi o Joowo gi ci azi ne; rewinet tuwenta
akati gi ci kare ka kutuguwe terkedinte o Joowo kujuk gi ci
kare naaga ootine cigaac doon. Zin giye nico mā kaarek
zinzeeti Jook giye ci kare akati zɔɔz nici gi ci kajezi ṇaan
tiṇeere amɔg Jooi gerzitin ma aanyet kozolit naaga ki
nɔɔnɔ mogin onin.*

Kilip cinai ma een dɔɔyiz cinai neen Jooi

Kilip cinai ma een dɔɔyiz cinai neen Jooi,
areyi niini tup nɔkɔ ka kitiritet mā te gɔɔn anyak
lɔɔci gerzitin.
Zin giye nico alaṇ naaga kanyak ṇoliin, mayo nun mā
amɔɔt lɔɔci
Mayo nuun apalpalani maama liilowe ma iinak
biyeen liil o adikir eecitɔ;
amɔɔt biyeen ki looc gerzitin, anyak liil ci anyaa
talnin kutuur o Joowo,
ki ceez o Jook o adikir kujuk kaal dook.
Ma kutuuri nica Jook neen, ma alaṇ niini oyoki been
neen.

Mã akanai gerzitin atirte niini.

Ajul Jooi kanyayit modena ḡoliin ci appe,
ma amoot kutuuryowa o adikir ma azi looci ḡim.

Karome naaga ki Manyi o anyak dɔyiz dook,
niini Jooi o Jakob lowen cinai neen.

Ivita zin icinit kaal o agoon Manyi,
icinit kaal o ateed ɔl biye agoon niini loota.
Abilni niini oroonok loocok dook,
ma aduul iriinya ki dilanya ma atooz kilibwa o
oroonto dook goya.
Azi niini ne; “Eelti ɔroon ma abon agayu keen naana
Jook o kadala moden dook ma kadala looc dook.”

Karome naaga ki Manyi o anyak dɔyiz dook,
niini Jooi o Jakob lowen cinai neen.

Beninok 46

Inoko zin abil tirten ki deten to

Eeci kanyak alaan ci ceez o Joowo adikir ci adiŋdiŋ ɔrɔɔt. Ook baale niini zee been Jook ele. Niini zin Yesu ween ɲeerti Joowo neen. Ma alaani cinai adikir noko aga kaal o alaŋ naaga kanim kagaac, eeci baale buk niini iya izi eet ci deer, ma acinnyai kiyo naaga o, maŋaan niini kabaca baciin codoi been neen. Kanyayit zin goon naaga moozet ka koŋoŋozit Jook baliinte onin ɲaao ka koɔt kojoktai naaga irken onin, ma kawucnek naaga noono. ɲinaante ɲaan kajowa naaga tirten iiten ci goon te akunaket ageet piryakzet.

Ibiro 4.14b-16

Bar zin giye o areezet Jooi ageet, kuwucek naaga noono ɔrɔɔt ele. Mayo nuun baale katobo ki ol ci adaai giye o kabacan oŋe e, iya Jooi orogozet niini doon bonate onin ɲaaten Kiristo. Mazin giye o koromtozeke naaga Yesu abil kiyo itinayet Jooi ageet been Kiristo daayiza, ma aanyet ageet kaavtiz buk aziite onin azo koromte ki Kiristo alaazete onin tammu tadena o. Agoon Jooi noko o ka keyeliza niini iinyaye ci ɲaan avu e dikiron o bonat onin giye o koromtozeke naaga Yesu Kiristo. Zin giye o ojoktayu niiga rogzen bonate o Joowo tuwenta, alaŋ agoonu gi nico niiga ootine cugooc, aanyuŋ igeet rogzen nico niini doon.

Alaŋ zin rogzen nici ajoyai kaale ci abon agooni, ka calaŋ adɔŋ ɔl eleeti ŋuume o Joowo. Aruguzet zin Jooi ageet o, ka kutuguuz naaga kaal ci abon ŋaaten Yesu Kiristo. Idimdimanet niini ageet ka kilinlinjit linlinjon onin abon loota ŋina.

Evesos 2.4-10

Ka zin naaga kicinte wak

Aku katin iiteni ci aɗorneke kaala o aanyek dook Jooi ɔl. Tiŋeere dɔyizi o aduwan ɔl zoozok o ayeizak nɔɔgo Jooi aɗorneke. Buk tiŋeere dɔyizi o azɔɔzi ɔl utugeetine ogen aɗorneke. Buk tiŋeere gɛenyizi aɗorneke. Maje reezinet abil niini nɔko ma alaŋ aɗorneke been neen. Eeci gɛenyizi cinai kanyak inoko o, alaŋ een dook neen. Buk dɔyizi ci kuuwayi naaga zɔɔz o Joowo inoko o, alaŋ een dook neen. Bar zin tiŋeere iitene ci ayeizaket Jooi kaal o ween didi dook e, maje kaala o alaŋ een didi dook aɗorneke.

Baale ŋaan keen kidic e, kazooz eo dole o miliny. Ma kabaaban kaal goole o dole o miliny. Bar zin mazi kidikira o, kotoŋa kaal baal kidiczetu e dook. Ma kaala ci kacini naaga inoko o, eel kiyo riritɔɔni o goon kacini eleeti maami o. Zin katin ma abada Yesu, ŋaan ayeizai kaala dook kicinit juruun. Inoko rak alaŋ naana kaga kaal dook juruun, bar zin tiŋeere ŋaan kaga naana kaal

dook juruun, kiyo buk agayaan Jooi aneet juruun o.

Anyak zin kaal ci eegin iiyu ci eel noko been neen,
tuwen, ki rewinet talniinta, been reezonet. Gi ci zin tiit-
iny oroot kujuk gonogi dook neen reezonet.

1 Korintiya 13.8 -13



Aterkedek Jooi Roget o Abil Been Neen ol o Atu Noono Dook

*Ma ol o aritai loota njina dook , adaai katin, maje bar olee o
atu Yesu,omoge muuri o daayizo vooritine o ayselza gool o
ako rogete o abil been neen.*

Yesu niini gool ma een didi ma een roget

Ma anek Yesu noogo ne, “Ma anyeku zinzeeti
kitiranyit, bar utuweec Jook. Utuyan aneet buk. Ma
korge o baaba anyak ceezi ci meelik ger. Inoko zin
naana kako ka kook kidimdiman jintunoon. Mate waan
kizi gi ci azeeto, alaj waan kaduwakun. Mazi kook
kidimdimana jintunoon o odota, naan kabada bodo ka
kiiya kooyun igeet, ka jinti kaave naana o, aavtiye niiga
buk. Agayu ri niiga gool ci ako naati kakoye naana o
noko.”

Ma anek Tomaz noono ne, “Manyi, alaj naaga jinti
akoye niina o kagaya. Kagaya yo gol ci akoye niina o
ku?”

Ma abedeke Yesu Tomaz anek ne, “Aneeta neen o
keen gol, ma keen didi, ma keen roget. Akom eet ci
akunak baaba calaj aduna niini naaten aneet. Inoko

zin mǎ agawtaanju niiga aneet o, ɲaan agayu buk koca tiŋeere niiga baaba buk. Bar zin buk inoko agawtu ma icintu nɔɔnɔ laadun.”

Ma anek Pilip nɔɔnɔ nɛ, “Manyi, yeleyet da baatun, olla gi ci karooŋnya dook nɛn.”

Ma abedeke Yesu nɔɔnɔ anek nɛ, “Pilip, koromte naana ki igeet ɲinti wuun kal. Maɲaan niina gawan nɔko? Ma zin azi nɛ, Yeleyet baatun o, naa? Ma ɛeti ci icinan aneet, icinun buk niini baaba. Pilip, alaŋ aga niina kaave naana ɲaati baaba, ma aavi buk baaba ɲaatan o? Ma zoozowa ci kaduwakuŋ igeet o, alaŋ kaduwa naana oowe caan doon, bar zin baaba o aavi ɲaatan agoon liŋliŋon onin niini maany. Abon zin atuyaŋ niiga aneet zooze o kanekuŋ nɛ, Aavi baaba ɲaatan, ma buk kaave ɲaatin. Mǎ alaŋ atuyaŋ niiga aneet zooze nico, utuyaŋ kaale o kagoon. Didile kaduwakuŋ igeet, ma ɛeti ci atuyan aneet agoon buk niini kaal o kagoon naana ɛɛ. Ma bar buk agoon niini kaal ci adikir ɔɔot kujuk nicoko, eeci inoko kako naana ɲaati baaba. Zin olla mǎ anyak gi ci ajinu niiga zaare ogan, ɲaan kagoonekuŋ naana igeet ka diŋdiŋoni o baaba keyelzyai ɲaaten ɲeerin. Mǎ anyak gi ci ajinaŋ niiga aneet zaare ogan, kagoonekuŋ.

Jɔn14.1-14

Kapirna inoko o ma tiijeere kajowa tiitinyon

Kaga naaga mā kayabiz titinyon o appe ka kaanyet Jooi ageet katin, kibeem piryakzet ci kapirnane inoko, piryakzet nici gi ci labak. Ma kaal o eenyca Jooi dook inoko areeyi talniinta, ma arɔɔŋ niigi iiten ci katin ayełzan Jooi dɔɔyiz ogin e kiiya kataman. Areeyi niigi o, eeci iziti niigi dook kaal ci labak. Alaŋ zin aanyek eleeti kiziti kaal ci labak niigi doon, bar aanyek nɔɔgo kiziti kaal ci labak Jooi. Anyak zin tiijeere iiten ci aarek Jooi ka kɔɔgjai kaal ogine baal eenyca niini e dook kaale ci ger aanyek nɔɔgo kiziti gerze noko. Ka zin kɔtɔɔzo niigi labak calaŋ acab kaala ci gerze noko , ka buk kanyayit niigi tiitinyon kiyo dɔɔlya o Joowo o.

Kaga naaga kaal o eenyca Jooi dook ŋaan apirna, ma ŋaan niigi alu nɔko zee been inoko o kiyo ŋaa o goon aam doole ka kotooyai o. Bar zin alaŋ zin alaŋ apirna ma alu kaala ogeen doon kaale o eenyca Jooi. Akom! Bar buk naaga alya o aanyet Jooi Vɔɔŋiz onin ka keyeleyet kaal o abon ka kaanyet niini ageet katin, ŋaan buk kapirna ma kalu nɔko. Ŋaan zin kare naaga iiten o katin atalnanet Jooi ageet kiziti dɔɔl cigin baliinte onin, ma aanyet niini ageet eleeti ci colai e. Orogozet zin Jooi ageet giye o kareewi naaga kaal o abon ka kanyet tiijeere niini ageet tuwenta. Inoko te kojokta kaal ci ŋaan kare noko, alaŋ waan bodo kareeyi. Eeci goon laadun mā ojowa eeti gi ci da goon are, alaŋ bodo areeyi. Inoko zin

mã kare naaga kaal ci ñaan kicinit neke, abon kare
zinzeetine ci alal zee ma alam tiñeere kajowa.

Rom 8.18-25

Kaal cigan zin bodo ogeen ci tiitinyik o

Bar buk zin naan kaanyeya kaal o loocu dook kizi kaal ci labak, giye o koroonje naana gi o abon doon. Tiitiny ñaatan oroot gawiin kujuk kaal nicoko dook gawiin o kagawe naana Manyi onan Yesu Kiristo . Zin giye cin kujukya kaal niceke dook tuu. Kanyeya noogo dook kizi kaal ci ger een riiriny, ka kojowa naana gool o Kiristo. Ka zin buk kanyak naana ñintan ñaatin. Alan karoon bodo naana kobona dooyize ci ele caan o doon giye ci kazoone lotinok o Juz, eeci naana inoko kaga kanyawa bonat ween didi nuume o Joowo giye o kutuwe Yesu. Gi ci adiñdin ñaatan oroot neen gawiin o kagawe Yesu been doyiz o ñaani niini daayiza, ma karoon buk koŋolta kibeen noono piryakzet onin. Ka buk kanyak naana tiitinyon daayiza kiyo buk baale niini e. Eeci karoon ka kitiñayan Jooi daayiza ka kook rogete o abil been neen.

Vilipiya3.8b-11



Kaṇaryonek ɔl o Ajowa Piryakzet

Abon bai Manyi ona Yesu Kiristo o anyak ganon
aanyun igeet ganon tup noko goolowe dook. Abon bai
Manyi Yesu aavi ṇaatunoon dook.

2 Tesalonika 3.16





Yelzan o Wεεgenya o Tammo

Terkediin o Rεen

Lotinok o vuruto

10.17-22.....19

Beninok

23.....11

46.....29

103.....15

Izaya

52.13-53.3.....20

Jona

2.1-9.....12

Terkediin o Colai

Matiyu

9.9-13.....8

11.28-30.....18

Jon

12.44-50.....7

14.1-14.....35

15.1-17.....9

Rom

5.1-11.....17

8.18-25.....37

8.31-39.....13

1 Korintiya

13.8-13.....32

15.21-28, 51-58.....24

2 Korintiya

4.16-5.8.....23

Evesos

2.4-10.....31

Vilipiya

3.8b-11.....38

2 Tesalonika

3.16.....39

Ibiro

4.14b-16.....31

5.7-9.....10

1 Pitor

2.4-7.....21

Wunozyak

21.1-4.....26

